

Xajon ra ma-ni jò ra tsikínda jè Pablo ra isìkasén-la xita naxindá-la Cristo ra títsajna ya Corinto

Kó'sín jè Pablo síhixo'ta xita Corinto

1 ¹ʼAn Pablo, ra kò'sín 'an tsikíxáya-na Cristo koni 'sín kjomejèn-la Nainá, inchinikasén-lajin jè xajon rakii, kò jè 'ndsé Timoteo. Inchinihixo'tá-lajin jìon ra xita naxindá-la Cristo 'mì-no ra titsajna ya naxindá Corinto. Kò nga'tsi ra 'ndsé ma ra a'ta 'tse Cristo ra ya títsajna nga tíjngo ya nangi Acaya. ²Nainá ra Na'ín-ná ma kò jè Jesucristo ra tíjna ítjòn-ná katatsjá-no kjonda kò kjo'nchán ya ajin inima-no.

Kó'sín nga jè Pablo tsjá-la kjonda Nainá

³Nda kata'yaxkón Nainá ra Na'ín-la ma Jesucristo ra tíjna ítjòn-ná. Nga jè Nainá ra Na'ín-ná ma, tseé kjohimatakòn tjín-la ra a'ta tsajién kò jé-ní Nainá ra ma-la síjetakòn ki'ta-ná. ⁴Jé síjetakòn inima-ná ni'sín ta mé kjohi'in ra kajieén, mé-ni nga ti'koa sijetakén jña ra ti'koa kjohi'in tjín-la; kò'sín sijetakén inima-la koni 'sín nga jè Nainá síjetakón-ná ra jién. ⁵Koni 'sín nga tse kjohi'in kajieén ra tjñà-ni kjohi'in ra iskajin jè Cristo, 'koaá ti'sín a'ta 'tse Cristo tseé kjoajetakòn sijn ya inima-ná. ⁶'Kia nga kò'sín inchinikjiín-jin kjohi'in, kí-ní nga jìon ma sakò-la kjoajetakòn inima-no kò kítjokajin-no kjohi'in. Kò tsa jè Nainá inchisíje takòn-najin, kí-ní nga ma sakò-te-najìon kjoajetakòn, kò ngi koo inima-no chíkjoako-te-no koni jña kjohi'in ra inchinikjiín-jin. ⁷Tjín kixií takòn-jin kjoa ra chiñá-jin ra a'ta tsajìon. 'Ya-nájin, nga tsa kò'sín

inchinikjiín-te jiòn kjohi'in koni ra jin, 'koaá tì'sín inchisakó-te-no kjoajetakòn ra tjín-najin.

⁸Jiòn 'ndsé ko tichjeé, jé ra mejèn-najin nga nda katasijin-no jñà kjohi'in ra iskajin-jin ya ján nangi Asia. Nga 'ñó tse kjohi'in inikjiín-jin ra 'ñó i'in tjín ra mì kì bijchótjìngi-la nga'ñó-ná, skanda tsixó-nájin, mí-la kì tì kitsakon-isa-né.

⁹'Koaá 'sín kjomà-najin nga ijyeé-la ko'sín tjínè-la nga kiyá-jin. Jñà kjoa ra ko'sín kjomà'tin-jin, jé tsakón-ya-najin nga mì kì machjeén nga ta jin kjó'tatakòn-jin ijo-najin, jé machjeén nga jè kjó'tatakòn-jin jè Nainá ra ma-la síkjaáya-la mi'ken. ¹⁰Jé Nainá isikatojin-najin kjohi'in ra kjobiya kji'ta-la, ko 'koaá 'sín siikatojin-isa-najin. 'Koaá 'sín jè kji'ta takòn-jin nga jè siikatojin-isa-najin ta mé kjohi'in-nì, ¹¹tsa kisìko'tá-nájin nga kinákjoa'ta-la jiòn Nainá ra a'ta tsajin. Tsa kjìn ma-ni xita ra kichja'ta-la Nainá, kjín koma xita ra kitso: “Tse kjonda kata'se-li Na'in”, 'kia nga ske jè kjonda ra Nainá títsjá-najin.

Mé-ni mì kì kiji-nì jè Pablo ya Corinto

¹²Tjín jngo kjoa ra ma nda níkítsajna-najin ijo-najin, jé-ní nga be-la takòn-jin nga tsje ko kixíí inchiníjchá-jin ijo-najin ya ajin-la xita isà'nde, ko nga 'ñó nda fiko-no ra jiòn. Kjoa kìi, a'ta 'tseé Nainá nchrabá-ni, ko mì tsa ta kjoachjine 'tse xita isà'nde ra inchinìchjeén-jin; ngi jé kjoachjine ra tsjá kjonda-la Nainá. ¹³Xajon ra tsikinda-lajin, mì tsa kj'íí tsò 'én ra tsiki'ta-lajin; kíí tsiki'ta-jin 'én ra ma chitá'yá jiòn ko ra ma nda kochiya-no ra a'ta tsajin; 'koaá 'sín tíkoñáa ra an nga nda kjón-ní katamachiya-najiòn. ¹⁴Koni 'sín ijye kjòchiya chiba-najiòn ra a'ta tsajin, 'koaá tì'sín tsja 'se-najiòn ra a'ta tsajin 'kia nga kj'íí india-ni jè Jesús ra tjina ítjòn-ná, koni 'sín nga tsja 'se-najin ra a'ta tsajiòn.

¹⁵Nga 'koaá 'sín tsaka'tá takòon kjoa kìi, 'koaá ma-ni nga ko'sín ísikítsjeen, nga yaá íkatsijen ítjòn-najiòn mé-ni nga ma jò 'ka sakò-najiòn kjonda, nga jò 'ka kjoáato-no. ¹⁶'Koaá 'sín ísikítsjeen nga mején-na ya kjoáato-najiòn 'kia nga kijiàa ya nangi Macedonia. Ko india kjoáato-najiòn tsiki 'kia nga koaáfa-na, nga ma kisìko'tá-najiòn 'kia nga kjiáan ya nangi Judea tsiki. ¹⁷'Kia nga ko'sín ísíkítsjen, ¿a taxkì ísíkítsjen-ná? ¿A tsó-ni kjoa nga 'koaá 'sín kí'siaan koni 'sín 'sín jñà ra xita isà'nde? Nga tsò: “Koma-ní”, ko askan, tsò india-ni: “Mì

kì koma.”¹⁸ Ndaá tíbe Nainá nga jè 'én ra 'benajmíya-lajin m̀i tsa jò tjín-la, nga m̀i tsa bixó-jin: “Koma-ní”, 'kia nga m̀i k̀i tsa koma-ni. ¹⁹Ra 'an kò Timoteo kò Silvano, 'kia nga inchi'bènajmíya-lajin a'ta 'tse Jesucristo ra l'ndí-la Nainá, jé 'benajmíya-jin 'én-la Nainá ra bitjasòn ra m̀i tsa jò tjín-la, nga Cristo, níkjíá nga jò 'ka chja nga tsò: “Koma-ní”, kò m̀i k̀i koma. Nga a'ta 'tse Cristo-ní nga bitjasòn jè 'én-la Nainá. ²⁰Ta mé 'én ra ijye kitsjà Nainá nga kò'sín koma, a'ta 'tse Cristo-ní nga bitjasòn ijye. 'Koaá ma-ni 'kia nga jè Nainá jeya níkjíneé bixó-né: “Kò'sín katama ra a'ta 'tse Cristo.” ²¹Jé Nainá ra kò'sín kixi inchisíkítsajna-ná nga ya titsajnakeé jè Cristo [ra jahjín-ni], kò jé Nainá ra kò'sín tsjahjín-ná nga kitsjà xá-ná. ²²Tí'koaá ijyeé tsikí'ta chiba-ná nga ijyeé 'tse tsó-ná, kò ijyeé tsikíjnajin ya inìma-ná, jè Inìma Tsje-la ra tjen kitsjà ítjòn-ná mé-ni nga ijye tjín kixi-ni nga tjábé ijye-ná mé ra ijye tjinda-la nga tsjá-ná.

²³Jé sabá Nainá síkíjna masen koni jngo xita ra be, nga jè nda tíkotsíjen kó'sín tíjna inìma-na. Tsa m̀i k̀i ikatsíjen-najìon koni 'sín nga kixian, ta kíí-ní nga majìn-na nga ajò koma-la inìma-najìon j̀nà 'én ra 'an tjín-ni nga kokó-no. ²⁴Majìn-najin nga jin kotèxoma-lajin koni 'sín nga makjìin-najìon a'ta 'tse Nainá. Jé ra mejèn-najin nga kisikò'ta-isa-lajin nga isa 'nó katasakó-najìon kjotsja, nga ijyeé 'nó kixi titsajna kò jìon kjoa ra makjìin-no ra a'ta 'tse Cristo.

2 ¹'Koaá ma-ni nga kò'sín isíkítsjen nga m̀i k̀i tí kiiikon-najìon, nga majìn-na nga ta kjoba kijchòko-no. ²Nga tsa 'an kijchòko-najìon kjoba, zyá ra ma tsjá india-na kjotsja? Nga ijyeé ta baá 'se-najìon. ³'Koaá ma-ni nga ta xajon ítikindá-no, tà ngatjì-la majìn-na nga jìon, ba 'ké-ná 'kia nga kijchòkjon-no, jé ra mejèn-na nga tsja 'se-naa kò ra jìon. Kò 'koaá 'sín tjíngo takoàan nga tsajìon 'kín ijye-la kjotsja-na. ⁴'Kia nga ítikinda-najìon jè xajon rakìi, taxkì tímakájnoó-na kò taxkì 'oón tíma-la inìma-na kò taxkì 'nó tíkjindaya. Tanga m̀i tsa k̀i xá ítikindá-na mé-ni nga kataba-najìon, kíí-ní mé-ni nga jchaa-najìon kó'ki 'nó tsjake-no.

Mé 'én ra tsjá Pablo a'ta 'tse jè xita ra tsakátsji-jé

⁵Jè xita ra kò'sín tsakátsji-jé m̀i tsa ta 'an jiàan ra tíbátsji-na kjoba, skanda koó-te jìon 'cho síkítsajna chiba-no. Ta chibaá

ko'tíxiaan mé-ni nga mì kì koto chiba-la koni 'sín nga tíchjàa. ⁶Ijyeé nda tjin jè kjo'hi'in ra ko'sín ijye tsikinè-la jìòn nga'tsì-nò jè xita rakìi. ⁷Ndi 'ndi jè ra machjeén nga tijcha'ta-la jìòn ko tijetakòn, mé-ni nga mì tsa ta kjo'ba kiyájin-ni. ⁸Koaá ma-ni nga ko'sín tíbítsá'ba-no nga jchibaya-no nga india tsjacha 'tian-no jè xita rakìi. ⁹Kíí xá ítsikinda-najìòn jè xajon, mé-ni nga nda kata'ya-la a kixíí kjoa, ¿a maá-no nda nihitjasòn ijye? ¹⁰Jè xita ra jìòn sijcha'ta-la, tí'koaá sijchá'tá-te-la ra 'an. Tsa tjin mé ra ma sijcha'tà-la, kjonda tsajìón-nájiòn nga ko'sín sijcha'tà-la ya ngixkon Cristo. ¹¹Mé-ni nga mì jè xita-níí ma sakò-la kó'sín nga siikijne-ná, nga ijyeé 'yeé kó'sín tjin kjoa maña-la.

Mé kjoa ra 'nó kisíkájno jè Pablo

¹²'Kia nga ijchòo ya naxindá Troas, nga tsi'kènjámíya 'én xitse ra nda tsò a'ta 'tse Cristo, ni'sín itjá'xa'nde-na nga ísíaá ra a'ta 'tse Na'ín-ná, ¹³tanga jè inìma-na mì kì nda ki'se-la, nga mì kì iskajàan jè ndí 'ndsé Tito. 'Koaá ma-ni nga kítsjiaan jñà xita ra ya i'nde-la, ko yaá kijiaa ya nangi Macedonia.



Kó'sín nga tsíkínda xajon jè Pablo ra isikasén-la jñà naxindá-la Nainá

Jñà ra síkijne ra a'ta 'tse Cristo

¹⁴Tse kjonda kata'se-la Nainá, nga nichjin nchijón-ní t'bakón kó'sín nga a'ta 'tse Cristo inchinikijne-jin. Ko a'ta tsajin-nájin nga tímabísòn nga tíjngoo jè kjoachjine ra tjín-la koni jngo jta-la tsajmì ra nda jne. ¹⁵Jin-jin, 'koaá 'sín kjòn-jin ra a'ta 'tse Nainá koni jta-la tsajmì ra 'nó nda jne ra jè Cristo tsjá-la Nainá; jta ra ya inchibijchókajin-la jñà xita ra inchibitjokajin kjohi'in ra kjoa 'tse jé-la. Ti'koaá yaá inchibijchókajin-la jñà ra ta ya inchichijajin jé-la. ¹⁶A'ta 'tse jñà xita ra ta ya inchichija, jè 'én ra 'benajmíya-jin 'koaá 'sín 'cho jne-la koni jngo jta ra sí'ken-ná; tanga jñà xita ra inchibitjokajin kjohi'in 'tse jé-la, 'koaá 'sín nda jne-la koni jngo jta ra síkijnakon-ná. Ra ta kjobítsjen 'tse, nijngoo xita ra chíkjoo-la nga 'keènajmíya 'én kii. ¹⁷Nga mì tsa ko'sín 'nià-jin koni 'sín kjín ma-ni xita ra ko'sín 'sín i'ka nga ton 'bénajmíya-ni jè 'én-la Nainá. Ngi 'koaá 'sín tjín takòn-jin koni 'sín nakjoá-jin ya ngxkõn Nainá ra a'ta 'tse Cristo, koni 'sín nga jè Nainá isikasén-najin, nga xita 'tseé tsò-najin.

Jñà ra sixá a'ta 'tse kjoa xitse-la Nainá

3 ¹Kia nga ko'sín bixó-jin, ¿a ta jé ijo-najin nda inchinikítsajna india-najin? Ko, ¿a 'koaá 'sín mejèn-najìòn tsa jngo xajon kokón-lajin ya nándà nga nda tíchja ra a'ta tsajin, o ra jión 'ki jngo-nájin xajon ya nándà nga nda kixó jìòn ra a'ta tsajin koni 'sín 'sín i'ka xita ra kj'íí? ²Jìòn sabá-nájìòn xajon-najin ra nda tíchja ra machjeén-najin, jngo xajon ra ya tjínda'tá ya ajin inìma-najin, jè xajon ra nda bexkon nga'tsi xita ko ti'koa ma kotá'yá. ³Koaá 'sín nda 'ya-la nga jión-nájìòn xajon ra jè Cristo tsikínda, ra jin tsako-najin nga inika'bí-jin. Jngo xajon ra mì tsa tinda-la làpi isinda-ni, nga ngi koó Inìma Tsje-la Nainá ra tíjnakon isinda-ni ra tjí'ta. Mì tsa najo isinda'tá, yaá isinda'tá ya ajin inìma-la xita. ⁴Nga a'ta 'tse Cristo-ní nga ko'sín tíjngoo takòn-jin nga 'koaá 'sín tjín kjoa kii ya ngxkõn Nainá. ⁵Mì tsa tsò-ni kjoa nga tsajin-nájin nga'nó ra nichjeén-jin 'kia nga ko'sín 'nià-jin kjoa kii. Nga nga'tsi kjoa ra ma-najin 'nià-jin, a'ta 'tseé Nainá nchrabá-ni nga'nó. ⁶Jè sabá Nainá isichjine-najin mé-ni nga sixá'ta-lajin nga kinákjoaya-jin kó'sín tjín kjoa ra tsikíndajin xitse india-ni

ra kjon̄da 'tse x̄ita. Kjon̄da ra tsik̄indaj̄in x̄itse Nainá, m̄i tsa ya nchrabá-ni j̄e k̄jot̄exoma ra isinda, yaá nchrabá-ni a'ta 'tse In̄im̄a Tsje-l̄a Nainá. K̄jot̄exoma ra ko'sín isinda, k̄jobiyaá bíné-ná, tanga j̄e ra a'ta 'tse In̄im̄a Tsje-l̄a Nainá nchrabá-ni, sík̄ijnakoón in̄im̄a-ná.

⁷J̄e k̄jot̄exoma ra ki'tsi-l̄a Moisés ra najo kisinda'tá, k̄jobiyaá bíné-ná. Tanga 'ñó ki'se-l̄a k̄joajeya j̄e isén-l̄a Moisés 'kia nga ki'tsi-l̄a j̄e k̄jot̄exoma k̄i, nga 'ñó fate ni'í tsats̄ijen nga skanda j̄ñà x̄ita Israel m̄i k̄i t̄i ma iskots̄ijen'á-ni ya isén-l̄a Moisés. Tsa ko'sín ki'se-l̄a k̄joajeya j̄e k̄joa ra ko'sín t̄jínè-l̄a nga ta ya fehe'ta, ⁸¿a mí tsa t̄jínè-l̄a nga isa 'ñó kata'se-l̄a k̄joajeya j̄e k̄joa x̄itse nga j̄e Nainá tsjá-ná j̄e In̄im̄a Tsje-l̄a? ⁹Tsa 'koaá 'sín 'ñó jeya k̄jomà 'kia nga j̄e Moisés ki'tsi-l̄a j̄e k̄jot̄exoma ra k̄johi'in bíné-ná, ¿a mí tsa isa t̄jínè-l̄a nga 'ñó kata'se-l̄a k̄joajeya a'ta 'tse k̄joa ra 'benajm̄iya-j̄in nga ko'sín j̄e Nainá, x̄ita kixií bachrjengi-ná? ¹⁰Ni'sín 'ñó ki'se-l̄a k̄joajeya k̄jot̄exoma ra ijye tsato, tanga m̄i k̄i t̄i mangásòn-ko-ni koni j̄e k̄joajeya ra t̄jín-l̄a j̄e k̄joa x̄itse-l̄a Nainá, nga síkatoné-l̄a. ¹¹Tsa j̄e k̄joa ra ta ya fehe'ta, tseé k̄joajeya ki'se-l̄a, isaá machjeén nga isa 'ñó kata'se-l̄a k̄joajeya j̄e kjon̄da x̄itse ra m̄i fehe'ta skanda ta mé nichjin-ni.

¹²Nga 'koaá 'sín t̄j̄jngo takòn-j̄in nga in̄chichiñá-laj̄in k̄joa k̄i, 'koaá ma-ni nga m̄i tsa masabà-naj̄in koni 'sín nga nakjoá-j̄in. ¹³Mi tsa ko'sín 'nià-j̄in koni 'sín ki'sin j̄e Moisés nga nikje xo'ba tsakájt̄sa ya isén-l̄a mé-ni nga m̄i k̄i ske-ni j̄ñà x̄ita Israel j̄e k̄joajeya ra ko'sín t̄jínè-l̄a nga ta ya fehe'ta. ¹⁴Tanga j̄ñà x̄ita Israel k̄jótájaj̄in in̄im̄a-l̄a skanda nichjin 'ndi 'ndi. 'Kia nga kotá'yá j̄e xajon ra t̄j̄'ta k̄joa jchínga ra tsik̄indaj̄in ít̄jòn Nainá ra a'ta 'tse x̄ita, takó 'koaá 'sín jngoya-l̄a koni tsa jngo nikje xo'ba k̄jij̄t̄sa k̄jobítsjen-l̄a ra m̄i k̄i tsjá'nde-l̄a nga machiya-l̄a. Nga takó kj̄e k̄i t̄jahíxìn-l̄a j̄e ra k̄jij̄t̄sa k̄jobítsjen-l̄a. Nga ta jngoó a'ta 'tse Cristo ma t̄jahíxìn-l̄a. ¹⁵Skanda nichjin 'ndi 'ndi-ni, j̄ñà x̄ita Israel 'kia nga kotá'yá j̄e xajon ra j̄e Moisés tsik̄inda, takó koni jngoó nikje xo'ba bíchj̄aj̄in k̄jobítsjen-l̄a nga m̄i k̄i machiya-l̄a. ¹⁶Tanga 'kia nga jngo x̄ita máfa'ta-l̄a Na'ín-ná ra t̄jna ít̄jòn-ná nga makjiín-l̄a ra a'ta 'tse, t̄jahíxìn-l̄a j̄e ra bíchj̄aj̄in k̄jobítsjen-l̄a. ¹⁷Nga j̄e Na'ín-ná t̄j̄jé-ni ra In̄im̄a Tsje. Ko j̄e x̄ita ra ya t̄j̄nain ya in̄im̄a-l̄a j̄e In̄im̄a Tsje-l̄a Nainá, ijyee t̄j̄nandí-ní. ¹⁸Nga'tsí-né,

'kia nga mì tì mé kjijsa-ni kjobítsjen-ná, 'koaá 'sín kjén koni jngo chitsín ra ma chitsíjen-yé, ra fate síkatsíjen jè kjoajeya-la Na'ín-ná; ko nichjin nchijón-ní nga tífaatjìya-ná koni 'sín nga inchi'yéé kjoajeya-la; 'koaá 'sín kjòn tímeé koni 'sín 'ki ra jè, nga jé Inìma Tsje-la Na'ín-ná ra ko'sín tísíko-ná.

Xita ra 'benajmíya a'ta 'tse Jesucristo

4 ¹Koaá ma-ni nga mì kì mahinda inìma-najin, nga jé Nainá ra ko'sín kjòhimake-najin nga kitsjá-najin jè xá rakì. ²Nachrjengi-najin jñà kjoa ra ta kjo'ma 'nié, kjoa ra tsjá-ná kjosabà. Mì tsa ta kjoa maña ra 'nià-jin, ko mì tsa kj'íí kjoa níkójin-jin jè 'én-la Nainá. Jè ra mejèn-najin nga nda 'kénajmíya-jin kó'sín tjín kjoakixi mé-ni nga jñà xita nda katachiya-la inìma-la kjoa ra 'nià-jin ya ngixkon Nainá. ³Tsa takó ko'sín ma i'ka-la jñà xita nga koni tsa kijjna'ma jè 'én xitse ra nda tsò a'ta 'tse Cristo ra 'benajmíya-jin, ta jñá-la ra ko'sín ma-la jñà ra inchichija ya ajin jé-la. ⁴Jè xita-níí ra tíbatéxoma-la nichjin ra titsajneé 'ndi 'ndi, ra ko'sín tjína koni tsa nainá, jé tsikíchjàjin ya ajin kjobítsjen-la jñà xita ra mì kì makjín-la a'ta 'tse Cristo, mé-ni nga mì kì koma ske-ni jè kjoahisen-la jè 'én xitse ra nda tsò a'ta 'tse Cristo ra jeya tjína. Nga jé Cristo ra bakón kó'ki kjòn-ni ra ngi jè Nainá. ⁵Mì tsa a'ta tsajin ra nda nakjoá-jin 'kia nga 'benajmíya-jin; jé 'benajmíya-jin ra a'ta 'tse Jesucristo nga bixó-jin: jé tjína ítjòn-ná. Ta chi'ndaá ma-jin ra a'ta tsajòn-jiòn, ta ngatjì-la kjotsjacha ra tjín-najin a'ta 'tse Jesús. ⁶Jè Nainá ra ko'sín kitsjà kjohixi nga katamahisen ya ñándà nga jñò chon; jé-ní ra ko'sín isihisen ya ajin inìma-najin, mé-ni nga koma sihisen-te-lajin jñà xita ra kj'íí, nga katabexkon jè kjoajeya-la Nainá ra 'ñó fate mahisen ya a'ta 'tse Jesucristo.

Kó'sín nga 'ñó tjín takén ni'sín kjohi'in kotojieén

⁷Jè kjoahisen-la Nainá koni jngo tsajmì ra 'ñó chjì-la, yaá tjínajin ijo-najin ra ko'sín jngoya-la koni jngo tjíí ni'nde, mé-ni nga nda kata'ya-la nga jè nga'ñó ra bato 'ñó nda tjín, mì tsa tsajin-jin, 'tseé Nainá-ní. ⁸'Koaá ma-ni, ni'sín jndíí ra ján kàjin-jin kjoa, tanga mì tsa jñà kjoa síkijne-najin. Ni'sín tjín kjoa ra 'ñó makájno-najin, tanga mì tsa nìkjahajen-lajin takòn-jin. ⁹Ni'sín mahatjìngi-najin xita, tanga mì tsa tsjin-

tákon-najin Nainá; ni'sín mejèn-la jñà xitá nga kinchanè-najin, tanga mì kì chíkjoa-la nga síkjesòn-najin. ¹⁰Ta ñánda nga mangí-jin, kji'tá nichjin mejèn-la jñà xitá ko'sín si'ken-najin koni 'sín inìko jè Jesús, mé-ni nga a'ta tsajin kata'ya-la nga jé Jesús ra tísíkjnakon-najin. ¹¹'Kia nga titsajnakon-jin, kji'tá nichjin kjobiya tísinè-najin ra ta ngatjì-la a'ta 'tse Jesús, mé-ni nga ti'koa a'ta 'tse ijo-najin kata'ya-la kjobinachon ra tsjá Jesús. ¹²'Koaá 'sín tjín ra jin, ta kjobiyaá inchichiñá ki'ta-lajin, tanga ra jiòn, jé kjobinachon ra mì fehe'ta tísakó-no.

¹³Jè xajon ra tjí'ta 'én-la Nainá, 'koaá 'sín tíchja nga tsò: “Kjokjiín-naa, 'koaá ma-ni nga kíchjää.” 'Koaá ti'sín tjín-te inìma-najin a'ta 'tse 'én ra makjiín-najin; ndaá makjiín-najin, 'koaá ma-ni nga nakjoá-jin. ¹⁴'Ya-nájin nga jè Nainá ra isikjaáya-la jè Jesús ra títina ítjòn-ná, 'koaá ti'sín siìkjaáya-najin koni 'sín nga jaáya-la Jesús; ko akjòn nga'tsí-né, yaá taña iko-ná ya ñánda nga títina ra jè sabà. ¹⁵Kjonda tsajión-nájion nga'tsi kjoa kii, mé-ni nga isa kjin ma-ni xitá ra katatjábé-la kjonda-la Nainá, ko jeya katijna Nainá 'kia nga isa kjin ma-ni xitá ra kitso-la: “Tse kjonda kata'se-li Na'in.”

¹⁶'Koaá ma-ni nga mì kì mahinda inìma-najin. Nga ni'sín tímajchínga ra ijo-najin, tanga jè inìma-najin nichjin nchijón-ní nga tíma-xitseyá-isa. ¹⁷Jè kjohi'in ra níkjíin-jin i isà'nde, ta chibaá kjohi'in tjín-ni; nga ta tíbato-ní; ko jngoó kjonda tjiko ra a'ta tsajin nga yaá sakó jngo-najin kjoajeya ra 'ñó tse ko ra níkjíá kjehe'tà. ¹⁸Nga mì tsa jñà chitsíjen-lajin jñà kjoa ra ma i isà'nde ra tsijen-ni; jñá chitsíjen-lajin jñà ra mì kì tsijen-ni ra a'ta 'tse Nainá nchrabá-ni. Nga jñà kjoa ra ma i isà'nde, ta tíbato-ní, tanga jñà ra mì kì tsijen-ni ra 'tse Nainá, mì kì kjehe'tà skanda ta kjíá-nioo.

5 ¹Jè ijo-ná, 'koaá 'sín jngoya-la koni tsa jngo ni'ya ra sinda i a'ta nangi ra ta chiba nichjin ma-la nga sasa fitsón-ña. Tanga tsa kjitsón-ña jè ni'ya rakii, títinaá jngo-ná ya ján ngajmi ni'ya ra títina skanda ta kjíá-nioo ra mì tsa xitá tsikínda, jé sabà Nainá tsikínda. ²'Koaá ma-ni nga imaá fahátse-la inìma-ná 'kia nga ya titsajnaya isee jè ni'ya rakii, nga jé ra mejèn-ná tsa ijye ya titsajnayeé jè ni'ya-ná ra títina ya ján ngajmi. ³Ni'sín sijna ijo-ná ra tja'ché 'ndi-ni, ijngo-isa ijo xitse tsjá-ná jè Nainá. Jè inìma-ná mì tsa ta ya sijnajin isén, ijo

xitsee 'se-la. ⁴'Kia nga takó tijnakon-isa ijo-ná ra 'koa jngoya-la koni jngo ni'ya ra ta chiba nichjin ma-la, ñó 'on tífahátse-la iníma-ná, nga majín-ná tsa katatjahíxín-ná jè ijo-ná ra tjinè-la nga kiyá; jé ra mejèn-ná nga kataxitseyá, mé-ni nga jè ijo-ná ra tjinè-la nga kiyá, jè kjobinachon xitse katasíjchijangi. ⁵Jé Nainá ra ko'sín ijye tsikínda nga tísíkijnanda-ná mé-ni nga ko'sín katameé. Ko jé kitsjá-ná jè Iníma Tsje-la, mé-ni nga ijye tjin kixi-ni kjoa nga tjábé-ná kjonda ra ijye tjinda-la nga tsjá-ná.

⁶'Koaá ma-ni tjiingoó takén nga nichjin nchijón-ní nga jè Nainá kji'tatakén, 'kia nga takó tijnakon-isa ijo-ná, takó kjiín títsajna-isa-lá ya i'nde ñánda nga tjna jè Na'ín-ná ra tjna ítjòn-ná. ⁷'Koaá 'sín inchiníjché ijo-ná koni 'sín tjin kjoa ra makjiín-ná; mì tsa ko'sín inchi'nié koni 'sín tjin kjoa ra ta xkén tsijen-la. ⁸Tanga ijyeé ko'sín tjiingo takén, nga jé ra isa ñó mejèn-ná tsa ijye kijmié ijo-ná ra tja'ché mé-ni ma ya kitsajna-né ya ñánda nga tjna Na'ín-ná ra tjna ítjòn. ⁹'Koaá ma-ni nga ko'sín binè-lá ijo-ná nga 'koaá 'sín 'nié koni 'sín tjin kjoa ra sasén-la ra jè, ni'sín ta ñánda títsajneé, a yaá títsajneé ya a'ta nangi o ra yaá títsajneé ya ján ngajmi. ¹⁰Nga 'koaá 'sín tjiné-ná nga'tsi-ná nga ya kijcho kincheé ya ngixkon ñánda nga tibatéxoma Cristo, mé-ni nga ko'sín katama'tieén koni 'sín tjin kjoa ra ki'nié ya isà'nde 'kia nga tsikítsajneé ya a'ta nangi; tsa nda ki'nié, kjondaá tjábé-ná, ko tsa 'cho ki'nié kjoa'choó tjábé-ná.

'Én ra tsjá-ná kjo'nchán ra a'ta 'tse Nainá

¹¹'Kia nga ijye 'ya-jin nga machjeén-ní nga kiskón-cha-jin Nainá, nga 'koaá 'sín jchaxkón-jin koni 'sín nga bakèn-la ra jè, 'koaá ma-ni nga 'benajmíya-lajin jñà xitá mé-ni nga katakjiín-la ra a'ta 'tse Cristo. Jè Nainá 'ñó nda tsijen-la koni 'sín tjin kjoa ra 'nià-jin; 'koaá 'sín mejèn-na ra 'an, tsa ko'sín nda katachiya-te-la iníma-najìon kó'sín tjin kjòn-ni kjoa ra 'nià-jin. ¹²Mì tsa ta ki-ni nga jin mejèn-najin nga nda síkítsajna india-najin ijo-najin; jé ra mejèn-najin nga ti'koaá katatsja-te-la takòn jìon ra a'ta tsajin, mé-ni nga sakò-no 'én kó'sín 'kín-la jñà xitá ra ta ijo-la nda síkítsajna ko mì tsa jè iníma-la nda síkinda ítjòn. ¹³Nga tsa ská-najin, a'ta 'tse Nainá-ní nga ská-najin; ko tsa ngi ndaá tjin kjobítsjen-najin,

kjonda tsajión-nájiòn nga ko'sín tjín. ¹⁴Jé kjoatsjacha-la Cristo ra itsabá'ño-najin ra ko'sín fiko-najin koni 'sín nga mejèn-la. Ko kif 'sín ijye nda isichiya-najin: Jngoó-ní ra 'ken-tjì-la nga'tsi xita, 'koaá ma-ni nga ijyee 'ken-te nga'tsi jña xita ra tjín. ¹⁵Ko nga'tsi jña xita, jé Cristo 'ken ngajo-la, mé-ni nga jña xita ra títsajnakon mì kì tì ta jña katatéxoma-la ijo-la, jé Cristo katatéxoma-la, jè ra 'ken-tjì-la ko jaáya-ila ra ta kjonda 'tse.

¹⁶'Koaá ma-ni 'ndi 'ndi, mì kì tsa tì ko'sín níkiítsjen-najin ra a'ta 'tse xita, koni 'sín isíkiítsjen ijo jé-najin. Ni'sín tsa ko'sín iníkiítsjen-jin ra a'ta 'tse Cristo nga tì'sa ítjòn; tanga 'ndi 'ndi, mì tsa tì ko'sín níkiítsjen-najin ra a'ta 'tse. ¹⁷'Koaá ma-ni, tsa jngo xita ijye ya tíjnako Cristo, ijyee xita xitseé kàma-ni ra a'ta 'tse Nainá. Jè kjoa jchínga-la ijyee kabato, saba kjoa xitseé kàma-ni 'ndi-ni.

¹⁸Nga'tsi kjoa kii a'ta 'tse Nainá nchrabá-ni nga ko'sín a'ta 'tse Cristo ma chibanda-né ko Nainá. Ko jé kitsjáxá-najin nga 'kénajmíya-jin kó'sín ma chibanda-ná ko Nainá. ¹⁹Tsó-ni kjoa, nga jé Cristo kisichjeén Nainá nga ma tsajoónda-ni ko xita isà'nde, ko mì tsa tì kinda ki'sin-ni kjoa 'tse jé ra tjín-la nga'tsi xita. Ko jín isingatsja-najin jè xá rakii, mé-ni nga sikabiya-jin 'én kó'sín nga ma chibanda-né ko Nainá. ²⁰'Koaá ma-ni, ngajín síkasén-najin Cristo nga nakjoá ngajo-lajin. 'Koaá jngoya-la koni tsa jè-ni Nainá ra tóbítsa'ba-najin 'kia nga ko'sín 'mì-lajin. A'ta 'tse Cristo-ní nga ko'sín inchibítsa'ba-lajin: “Jchibànda-no ko jè Nainá.” ²¹Jè Cristo, nijngo jé tsakátsji ra jè; tanga ta ngatjì tsajién-ná nga ko'sín jè Nainá tsakánè jé-la, mé-ni nga ko'sín xita kixi kama-né ya ngixkon Nainá 'kia nga ijye ya titsahijyokeé jè Cristo.

6 ¹Ngajin, ra ya inchiníxá'ta-te-lajin Nainá, 'koaá 'sín bitsa'ba-lajin: Nda tichjeén jiòn kjonda ra ta kjotjò títsjá-no Nainá. ²Nga 'koaá 'sín kitsò Nainá:

Jé kjón nichjin 'kia nga chiba-la kjochjeén-li kjonda-na, kí'nchrè-la.

Ko jè nichjin 'kia nga tjichiñá-la nga kítjojin kjohi'in, isíkiíjnandí-ila.

Nda kjón tiná'ya jiòn, 'ndíí 'ndi-ni nda chiba-la nga tímachjeén-no jè kjonda-la Nainá, ko 'ndíí-ni nga ma kítjojon jiòn kjohi'in.

Kjohi'in ra tsatojin Pablo

³Mì tsa mé kjoa'cho ra inchi'nià-jin ra ma 'cho kama-la xita ra kj'íí, mé-ni nga mì yá ra 'cho kitso-la jè xá ra inchi'nià-jin. ⁴Ta isaá, 'koaá 'sín ngi nda inchi'nià-jin. ⁵Ta isaá, 'koaá 'sín ngi nda inchi'nià-jin. ⁶Ta isaá, 'koaá 'sín ngi nda inchi'nià-jin. Nga 'nó tjin-najin kjoatsetakòn, nga 'nó tse kjohi'in titsajin-jin, nga tíchija'ta-najin tsajmì ra machjeén-najin, nga chjá tíma-najin kjoa ra tíbatojin-jin; ⁷nga tìniki'on-najin, nga nìkjaha'sen-najin ndayá, nga tsò-najin xita nga jíin-ró fatsji-lajin kjosi xita naxindá, nga iyí xá ra 'nià-jin, nga mì tì tsa tsjafè-najin, nga inchinikjín-jin ra kjinchrá. ⁸Tanga ngi tsjeé inchiníjchá-jin ijo-najin; kò ndaá machiya-najin kó'sín tjin kjohixi; kò chíkjokoó-najin 'kia nga kó síko-najin xita; kò tjin-la kjonda iníma-najin ra a'ta 'tse xita; jé Iníma Tsje-la Nainá tísíxájin iníma-najin; kò ngi koó iníma-najin nga tjin-najin kjotsjacha. ⁹Ngí 'én kixíí ra nakjoá-jin. Nga'nó-la Nainá-ní ra timako-jin. Kò jñà kjoakixi ra 'nià-jin, 'koaá 'sín jngoya-la koni jñà kichá ra kò ngaskoán kò nga kixi nichjeén-jin nga basìko-najin. ¹⁰Sa'koaá nda 'yaxkón-najin kò sa'koaá mì kì 'yaxkón-najin. Sa'koaá nda bítjongi-jin kò sa'koaá mì kì nda bítjongi-jin. Sa'koaá xita ndiso 'mì-najin, tanga ngi 'én kixíí ra nakjoá-jin. ¹¹'Koaá 'sín nìko-najin koni tsa mí kì 'yaxkon-najin, tanga 'nó nda 'yaxkon-najin. 'Koaá kjòn-jin koni tsa ijye inchi'nià-jin, tanga 'nó nda titsajnakon-isa-jin. Tsja-najin kjohi'in jñà xita, tanga mì tsa sí'ken kjòn-najin. ¹²'Koaá 'sín kjòn-jin koni tsa ba tjin-najin, tanga 'nó tsja tjin-la iníma-najin. 'Koaá 'sín kjòn-jin koni tsa xita íma-najin ra nímé kjonda tísakó-la, tanga 'nó kjin xita tísakó-la kjonda 'tse Nainá ra a'ta tsajin. 'Koaá kjòn-jin koni tsa nímé ra tjin-najin, tanga ya ngixkon Nainá nímé ra chija'ta-najin. ¹³Jìon 'ndsé ra ya Corinto tsajìon, 'koaá 'sín inchinakjoá kixíí-lajin, nga ngi koó iníma-najin nga tsjacha-lajin. ¹⁴Mì tsa xkon tjin iníma-najin ra a'ta tsajìon, tanga jíon-najin ra xkon tjin iníma-no ra a'ta tsajin. ¹⁵Mé-ni nga kongásòn-ni kjoa ra síkeé xàngieé, 'koaá 'sín tíbítsá'ba-najin koni tsa íxti-na xin-no, kì xkon níkjina iníma-no.

Kó'sín nga machjeén nga kìncha'taxìn-la ra kjoa 'tse jé

¹⁴ Kì jñà níngàsòn-koo kjobítsjen-no kò xitá ra mì tsa a'ta 'tse Cristo makjiín-la. Nga, ¿kó'sín kama-ni nga kóngàsòn-kjo jngo ra xitá kixi yá ngixkòn Nainá kò jngo xitá ra tsìn-lá kjoakixi-lá Nainá? ¿A kamaá jñò kochon yá ñánda nga tjin ní'í ra síhsen? ¹⁵ ¿A maá nga nda kohijta jè Cristo kò jè xitá-ní'í? Kò, ¿a kamaá-te nga yá nda kohijtako jngo xitá ra makjiín-la a'ta 'tse Cristo kò jngo ra mì kì makjiín-la? ¹⁶ Majìn, nga jè ni'ya ingo-la Nainá, mì kì ma nga yá sijnyaya jngo xkòsòn ra nainá tsò-lá xitá. Nga jién jnchreé ra meé ni'ya ingo-la Nainá ra tijnakon. Koni 'sín ijye kitsò Nainá a'ta 'tse xitá ra makjiín-la a'ta 'tse, nga kitsò:

Yaá kótijnako kò yaá kojmejín-la naxindá-na.

'Aán koma Nainá-la kò jñá koma xitá naxindá-na.

¹⁷ Koá ma-ni nga kò'sín kitsò-te a'ta 'tse xitá-la:

Títjokajion yá ajin-la xitá kù, kò tìncha'taxìn-la.

Kì jñà chaájion kjoa ra tje tjin yá ngixkoàan,

'koaá 'sín kama-ni nga 'an skábétjò-no.

¹⁸ 'An-ná ra skaábétjò-no nga Na'in-no kama,

kò jiòn kama jiòn ixti 'xin-na kò ixti íchjín-na,

'koaá xian-no 'an ra Nainá 'mì-na ra tijná títjòn-no,

'an ra ta 'an tajngo-naa ra 'ñó tse nga'ñó tjin-na.

7 ¹ Jiòn 'ndsé ra tsjake-no, tsa kò'sín tjin kjoa ra tjinda-la Nainá ra a'ta tsajién, machjeén-ní nga kìncha'taxín-lá nga'tsi kjoa ra tje tjin ra síkitsón-ná nga sítjé ijo-ná kò jè inìma tsje-ná. Kji'tá nichjin kjótsjieé nga isa tsje kitsahijyeé a'ta 'tse Nainá nga kò'sín kiskón-cheé ra jè.

Kjoatsja-la Pablo ra a'ta 'tse xitá Corinto

² Chjíbétjò-nájin yá ajin inìma-no. Jin, kjè tsa yá ra jin 'cho niko-jin, kò kjè tsa yá ra kjobítsjen-la nìkitsón-jin, kò kjè tsa yá ra jin chìndocha-lajin. ³ 'Kia nga kò'sín tíxin-no, mì tsa mé ra tíbanè jé-no; ijyeé kò'sín kixin-no 'kia nga 'sa ítjòn, jiòn-jiòn, kji'tá nichjin tsjacha-lajin kò yaá titsajnakjeé kò yaá kiyákjeé. ⁴ Ngì 'én kixi kjón-ní koni 'sín nga tíchjà-no; 'ñó 'be-la takoàan ra a'ta tsajiòn, 'ñó ma'ñó takoàn kò 'ñó sakó-na kjótsja ni'sín ta mé kjohi'in ra 'se-najin.

⁵Skanda 'kia nga 'jii-jin i nangi Macedonia, kjè tsa mé ra níkjáya-jin. Kjin skoya kjoa in-chibatojin-jin: jndíi ra ján tjín-najin kjosi; ngi ta kjoskoón titsajin ki'ta-jin. ⁶Tanga jè Nainá ra ma-la sje ikon jná ra inda tjín ikon; jé isje ikon-najin 'kia nga 'ji jè Tito. ⁷Ko mì tsa tà ki-ni nga 'jijikón-najin nga kjoje takòn-jin, kií-te nga 'nó tsja tjín-la ra a'ta tsajìòn kó'sín nga inije takòn jìòn ra jè. Tsi'kénajmí-najin nga 'nó mejèn-najìòn nga skajieén. 'Koaá ti kitsò-najin nga 'nó tjín-najìòn ra kjoba ko nga 'nó tímakájno-najìòn ra a'ta tsa'an. 'Kia nga kí'nchree 'én kií isaá ta 'nó tsja ki'se-isa-na.

⁸Ni'sín ta kjoba ítsakatsjí-najìòn 'kia nga ko'sín ísikásén-no xajon, kixíi kjoa kjókájnoó-na nga ti'sa íjtòn ra a'ta tsajìòn nga baá ki'se chiba nichjin-najìòn. Tanga 'ndi, mì kì ti tsa tísíkájno-naa. ⁹Ta isaá jnchro, 'nó tímatsja-isa-na, tanga mì tsa ki-ni matsja-na nga kjoba tsakatsjí-najìòn; kií-ní nga jè kjoba ra tsikitsajinjin jìòn, jé tsasiko-najìòn nga ma iníkájno jè jé-no ko nga ma tsáfa'ta-la jìòn Nainá. Tsa ko'sín kjoba-najìòn koni 'sín mejèn-la Nainá, tsó-ni kjoa nga mì tsa mé kjoa'cho ra tsakjatsji-lajin. ¹⁰'Kia nga ko'sín maba-la inìma-ná koni 'sín nga jè Nainá mejèn-la, jé basiko-ná nga ma níkájneé jé-ná ko mì tsa ti jé fatsji-ná, mé-ni nga ma kíjtokajieén kjohi'in 'tse jé-ná, ko mì tsa mé ra askan níkájno-ná. Tanga tsa 'kia ya nchrabá-ni kjoa ra síba-la inìma-ná a'ta 'tse kjoa ra tjín ya isà'nde, ta kjobiyaá sakó-ná. ¹¹'Kia nga ko'sín kjoba-la inìma-najìòn koni 'sín nga jè Nainá mejèn-la, jión inchi'ya-no 'ndi-ni nga 'nó tse tjín-ni kjonda ra isakò-no. Nga 'nó in-chibinè-la ijo-no kjoa ra nda tjín, ko 'nó in-chibixkàn-tjìò ijo-no nga mì mé kjoa tjín-no; 'nó in-chinìjticha a'ta 'tse kjoa ra 'cho tjín, ko 'nó tjín-no kjoa skon, 'nó mejèn-no nga skajieén, ti'koa 'nó makájno-no jè ra a'ta tsa'an, ko ki'tsi-la kjohi'in jè xita ra 'cho ki'sín. Ta nga'tsi-ni kjoa kií, 'koaá 'sín tsakon jìòn ijo-no nga mì tsa mé jé tjín-no ra a'ta 'tse kjoa kií. ¹²'Kia nga ko'sín ísikinda-najìòn xajon, mì tsa jè ísikítsjeen a'ta 'tse xita ra 'cho ki'sín, ko a'ta 'tse jè ra 'cho kjomà'tin. Jé-ní ra mejèn-na nga tijìòn kjòn nda katachiya-no kó'sín nga tsjacha-nájin. ¹³Jná nga'tsi kjoa kií ra 'nó isje takòn-najin.

Ni'sín isakò-najin kjoajetakòn ra a'ta 'tse kjoa kií, tanga isaá ta 'nó kjotsja-isa-najin 'kia nga kijcha-jin jè Tito nga 'nó tsja tjín-la, ta ngatjì-la nga 'nó tse kjonda ra isakò-la ra a'ta tsajìòn.

¹⁴Ijyeé asa kókíxian-là jè Tito nga 'nó 'be-là takoàan ra a'ta tsajìon kò m̀ tsa 'cho inchiníkjina-nájìon. Koni 'sín nga ngi 'én kixi-ní nga'tsi jè 'én ra ijye inakjoáko-lajin, 'koaá tì'sín 'én kixi kjomà-ni jnà 'én ra kotsi'kìn-lajin jè Tito ra a'ta tsajìon. ¹⁵Jè Tito, isaá ta 'nó matsjake-isa-najìon 'kia nga bítsjen-là kó'sín nga nda inihitjasòn-la. Kò nga 'nó nda ichjìbétjò jìon 'kia nga ijchòjkon-no kò tì'koaá 'nó nda kijchaxkón-te. ¹⁶'Nó matsja-na nga kò'sín nda ma ba'tá takòn-najìon ra a'ta 'tse ta mé kjoa-ni.

Mé-ni machjeén-ni nga 'ki jngeé kjotjò ra a'ta 'tse Nainá

8 ¹Jìon 'ndsé kò tichjeé, mején-te-najin 'kénajmí-lajin kjonda ra jè Nainá títsjá-là naxindá-là Cristo ra títsajna ya nangi Macedonia. ²Nì'sín takó 'nó i'in tjín kjoa ra inchibatojin, 'nó tjín-là kjotsja inìma-là. Kò nì'sín 'nó ndí xita ima, isaá ta 'nó tse inchitsjá kjotjò ra jè Nainá inchisíngatsja, 'koaá jngoya-là koni tsa xita nchiná. ³'An kjón kítsee nga ngi kòó kjotsja-là kitsjà koni 'ki kjomà ra ki'sín, kò skanda isaá tse kitsjà-isa koni 'ki nga ijchòtjingi nga'nó-là. ⁴'Nó tsíkítsa'ba-najin nga kitsò-najin: “Tì'nde-nájin nga koma 'ki chiba-te-jin kjotjò ra kiji-là jnà xita tsje-là Nainá ra tíchija'ta-là.” ⁵Isaá kjìn kjoa ki'sín-isa koni 'sín nga inchichiñá-lajin. Ítjòn nangi isíkítsajna inìma-là ra a'ta 'tse Nainá, kò akjòn, 'kiaá kò'sín ki'sín-te ra a'ta tsajin koni 'sín nga mejèn-là Nainá. ⁶'Koaá ma-ni nga kò'sín tsíkítsa'ba-lajin jè Tito, nga takó jè katabíxkójin jnà kjotjò ra nchrabájin inìma-no koni jngo kjonda ra singatsja jìon Nainá. Kò'sín katasíkjehe'ta xá ra ki'tsi-là nga tì'sa ítjòn. ⁷Koni 'sín nga 'nó nda 'nià jìon nga'tsi kjonda: nga nda makjín-najìon a'ta 'tse Cristo, nga tjín-no 'én kó'sín nakjoá, kò nga tjín-no kjoachjine, kò nga titsajnanda-no nga ma siitjasòn kjoa ra nda tjín, tì'koa nga tjín-no kjotsjacha ra a'ta tsajin; 'koaá tì'sín machjeén nga tì'koa katama-no 'tìo jè kjonda rakìi.

⁸Mì tsa jngo kjotéxoma tíbiné-no 'kia nga kò'sín tíxin-no. Jé ra mejèn-na nga jcha-là a kixi kitií kjoa nga tjín-no kjotsjacha, koni 'sín nga 'nó tjín-là kjotsjacha jnà xita ra i'ka nga síxátíya-là ijo-là nga tsjá kjotjò-là. ⁹Ijyeé 'ya-nájìon jè kjonda-là Jesucristo ra tjína ítjòn-ná nga ta ngatjì-là nga 'nó kjotsjake-najìon, xita imaá ki'sín ijo-là, nì'sín xita nchiná kjòn-ni ra jè, mé-ni nga koni 'sín nga xita ima kjomà ra jè, tsajìon 'kín-la kjoanchiná ra tjín-là.

¹⁰Tsjaá-no kjobítsjen-na ra a'ta 'tse kjoa kù, nga kjeèn-no ndiyá; jìon ra tsiki'tsiaà nga ko'sín ki'nià a'ta 'tse kjoa kù, mì tsa ta mejèn-no nga tsiki'tsiaà, skanda 'ñó kjomejèn-no tsi'kiò, skanda ti'kia-ni nichjin jngo inó. ¹¹Tikjehe'tin-la ijo-no nga 'kiòò 'ndi-ni, koni 'sín nga 'ñó tsja tjin-no nga mejèn-no tsi'kiò, 'koaá ti'sín tihitjasòn nga 'tioo kjotjò-no koni 'ki nchrabájin inìma-no. ¹²Tsa jngo xitá tijnanda nga inìma-la nchrabájin-ni nga mejèn-la tsjá, Nainá sasén-la koni 'ki ra ma ra 'sín, mì tsa tsato tíníjé-la.

¹³Mì tsa jè ra mejèn-la Nainá nga katasíjchija'ta-najìon 'kia nga kisiko jìon jñá xitá ra i'kaa, jé-ní nga ngásòn ngáya kata'se-ná nga'tsi-ná ta mé ra machjeén-ná. ¹⁴Kó'ki tjin-najìon 'ndi 'ndi, 'ti-la jìon koni 'ki chija'ta-la, mé-ni 'kia nga jìon ra sìjchija'ta-najìon, ti'koaá jñá tsjá-no kó'ki 'se-la, mé-ni nga ngásòn ngáya 'se-no mé ra kochjeén-no. ¹⁵Koni 'sín nga tíchja Xajon-la Nainá nga tsò: “Jè ra kjin tsikíxkó, mì tsa mé ra tsijnengi-la; ko jè ra chiba tsikíxkó, mì tsa mé ra ichija'ta-la.”

Kó'sín nga inikasén jè Tito ya naxindá Corinto

¹⁶Tse kjonda kata'se-la Nainá, nga 'koaá ti'sín isíkijna inìma-la Tito nga ko'sín isíkájno-te ra a'ta tsajìon koni 'sín nga kjókájno-na ra 'an. ¹⁷Kixíí kjoa jè Tito kjokjín-la koni 'sín nga tsiki'tiáan; tanga jè, 'ñó kjomejèn ko 'sa-la nga ikatsíjen-najìon ko ngi ta kjonda 'tse-ní nga ko'sín tífikatsíjen-najìon ra jè.

¹⁸Yaá taña inchinikasén-ko-jin jè Tito, jngo 'ndsé ra ijye nda na'yá-la ya ajin-la nga'tsi naxindá-la Cristo nga kó'sín tísíxáko jè 'én xitse ra nda tsò a'ta 'tse Cristo. ¹⁹Ko mì tsa ki-nì nga ijye nda 'yaxkon-la, jñá sabá xitá naxindá-la Cristo ra ko'sín tsjahíjin mé-ni nga taña iko-najin, 'kia nga kongíko-jin kjotjò ra jin inchibíxkó-jin, mé-ni nga jè Na'ín-ná isa jeya katijna-nì, ko nda kata'ya-la nga yaá nchrabájin-ni ya inìma-najin nga ko'sín 'nià-jin. ²⁰Koaá 'sín koma-ni nga mì yá xitá 'cho kitso-najin a'ta 'tse kjotjò ra nda 'ki tjin-ni ra jin inchibíxkó-jin. ²¹Jè ra mejèn-najin nga mì tsa ta ya ngixkon Na'ín-ná kixi katana'yá-najin, ti'koaá kixíí katana'yá-te-najin ya ngixkon xita.

²²Ijngo-isa 'ndsé ya taña inchinikasén-ko-jin jè Tito, ra kjokjin kjoa 'ya-jin nga bínè-la ijo-la, ko isaá 'ñó bínè-la ijo-la 'ndi 'ndi 'kia nga ko'sín ijye nda bá'ta ikon-no ra jìon. ²³Ra

jè Tito, yaá taña báhiytako-na ra jè, kò tañaá níxá-jín ra a'ta tsajìon; a'ta 'tse 'ndsé ra i'ka ra jò ma-ni, jñà xitá naxindá-la Cristo isikasén ra jñà, nga ra a'ta 'tse jñà xitá kii, jé Cristo jeya bijna. ²⁴Mé-ni nga nda katabe-ni nga'tsì xitá naxindá-la Cristo, nda tikoo jìon jñà xitá kii nga takón-la kó'ki kjotsjacha tjín-no ra a'ta 'tse, mé-ni nga ske-ni ra jñà nga 'én kixi-ní koni 'sín nga nda nakjoá-jín ra a'ta tsajìon.

Jñà kjotjò ra kjóxkó

9 ¹A'ta 'tse kjotjò ra tímaxkó nga tíbisiko'ta jñà xitá-la Nainá ra inchichija'ta-la, mì kì machjeén tsa mé 'én ra 'an kindá-najìon. ²Nga ijyeé be-náa nga titsajnanda-najìon nga 'kiòè kjotjò-no, 'koaá ma-ni nga 'ñó matsja-na ra a'ta tsajìon, 'kia nga ítsi'kenajmí-la jñà xitá ra ya nangi Macedonia títsajna, nga tì nichjin jngo inó tjín-ni nga mejèn-najìon 'kiòè kjotjò-no, jìon ra ya titsajna ya nangi Acaya. 'Kia nga kò'sín ítsi'kenajmí-la nga ijyeé nda tihijyondá jìon, isaá ta 'ñó kjotsja-la nga tì'koaá mejèn-la nga tsjá-te jñà kjotjò-la. ³Kíí xá ísikásén-najìon jñà 'ndsé kii, mé-ni nga mì tsa ta 'én ndiso kama-ni koni 'sín nga ijye 'ñó nda kichjá ra a'ta tsajìon. Jé-la ra nda tjín tsa kò'sín ijye titsajnanda jìon koni 'sín ijye kixian. ⁴Tsa tjín i'ka-ni xitá ra ya i'nde-la ya nangi Macedonia ra mejèn-la nga iko-na 'kia nga kjiáan, tsa takó kjè kì titsajnanda-najìon 'kia nga kijcho-jín, koni 'sín nga chiñá-jín, ta kosabáa-najín, kò jìon, isaá ta tse kjosabà kitsajìon. ⁵'Koaá ma-ni nga kò'sín ísikítsjeen nga tsikítsá'ba-la jñà 'ndsé nga tjen katafikatsijen ítjòn-najìon, mé-ni nga tjen kátíxkó jè kjotjò ra ijye kò'sín tsikinè-la ijo-no nga 'kiòè, mé-ni nga ijye tjínanda-ni koni jngo kjotjò ra inìma-no inchrabájin-ni kò mì tsa jngo kjotjò ra kjo'ñó inchima-no.

Kó'sín tísi'tieén nga ma-ná 'kieé kjotjò

⁶Tíkítsjen jè 'én ra tsò: Jè xitá ra chiba tsajmì bítje, chibaá tsajmì majchá-la; kò jè ra kjìn tsajmì bítje, kjín tsajmì majchá-la. ⁷Kò'ki 'tiqo nga jngó jngó-no koni 'ki nga nchrabájin inìma-no; kì tà kò kjoba-no nga 'biò kò kì tà jò tjín-no nga 'biò. Nainá, jé tsjake xitá ra ngi kò kjotsja-la tsjá. ⁸Jè Nainá maá-la nga kò'sín 'sijn nga 'se ijye-najìon ta mé kjonda-ni, mé-ni nga sakò ki'ta-najìon kó'ki tsajmì

machjeén-no; nga skanda kijnengií-no ra sakò-no, mé-ni ko'sín ma kisiko'ta-no ta ñáa kjoa ra nda tjin. ⁹Koaá 'sín tichja xajon ra tji'ta 'én-la Nainá nga tsò:

Nda kjon isika'bí nga kitsjà-la jña ra xita ima.

Ko jè kjoakixi ra 'sín, tjna ki'ta-ní skanda ta kjiá-nioo. ¹⁰Jé Nainá ra tsjá tje-la tsajmì nga síxako nangi jña xita, ko ti'koa tsjá-la niño ra bakjèn; jé tsjá-no mé tsajmì ra kítjee ko 'koaá 'sín 'sijn nga isa kokjìn-ya tsajmì-no, ko kjin kjonda sakò-najiòn koni 'sín tjin kjonda ra 'siaan. ¹¹'Seé-no ta mé kjoanchiná-ni, mé-ni nga ngi koó inima-no nga 'kiò ta mé kjotjò-ni; mé-ni nga kjin xita kitso-la Nainá: “Tse kjonda kata'se-li Na'in a'ta 'tse jè kjotjò ra kitsjà xita kii.” ¹²'Kia nga ko'sín inchimahíko-lajin jè nga'ño rakii jña 'ndsé, mì tsa ta jè-ni nga ma tibusiko mé ra chija'ta-la jña xita-la Cristo. Ti'koaá yaá nchrabá-ni nga 'ño kjin xita inchitsò-la Nainá: “Tse kjonda kata'se-li.” ¹³Jña xita kii, 'kia nga kongatsja kjotjò kii, jeyaá siikijna Nainá ta ngatji-la nga ma-najiòn ko'sín nihitjasòn jìòn koni 'sín nga makjiín-no ra a'ta 'tse 'én xitse-la Cristo ra nda tsò, ko nga maá-najiòn 'biò kjotjò-no ra tibusiko'ta ra jña, ko jña xita ra kj'íi-isa. ¹⁴Ti'koaá 'ño tsja 'se-la nga kichja'ta-la Nainá ra a'ta tsajiòn; yaá jcha-la nga 'ño tsjake-najiòn ta ngatji-la nga tseé kjonda tísakó-najiòn ra a'ta 'tse Nainá. ¹⁵¡Tse kjonda kata'se-la Nainá, nga ijye tsikijnanda jngo-ná kjotjò ra 'ño chji-la, skanda mí ki sakó-ná 'én kó'sín nga 'ki-lá kjonda!

Kó'sín nga chjatji xá-la Pablo koni nga chi'nda-la Cristo ma

10 ¹¡An ra Pablo 'mì-na, 'koaá 'sín tíbítsá'ba-no a'ta 'tse Cristo jè ra indakjoa tjna ko ra tjin-la kjonda. Nga tjin i'ka xita ra tsò nga 'kia-ró ya tijnajin-najiòn, 'ño-ró ima kjoa 'siaan, ko 'kia nga kjin tjna, 'ño-ró xíjiaan. ²'Koaá 'sín tíbítsá'ba-no nga tjen tindajín i'ka kjoa ra tjin, mé-ni nga 'kia nga kijchòo, mì tsa ti 'an 'ño kokó-na jña xita ra ko'sín inchichjajno i'ka-najin, nga tsò nga ta 'koaá-ró 'sín inchi'nià-jin koni 'sín 'sín jña ra taxki xita isà'nde; ko tsa majin, 'an ijyee ko'sín tijnanda nga ko'sín 'ño kokóo jña xita kii. ³Kixí kjoa, xita isà'nde-nájin, tanga mì tsa ko'sín 'nià-jin koni 'sín 'sín jña ra taxki xita isà'nde 'kia nga mé kjoa ra bixkàn-ko-jin. ⁴Jña nga'ño ra nichjeén-jin koni tsa kicha nga bixkàn-tji-jin

ijo-najin ya isà'nde, mì tsa a'ta 'tse xita nchrabá-ni. A'ta 'tseé Nainá nchrabá-ni, kò maá-la nga síkjesòn nga'tsi nga'nó-la níí ra batéchjà-la 'én-la Nainá. ⁵Kò nìkítsón-ña-nájin nga'tsi kjobítsjen ra 'cho tjin, kò jngó jngó kjoa'ngatakòn ra batéchjà nga kondra fi-la koni 'sín tjin kjoachjine-la Nainá, bichjà'ya tsje-nájin kjobítsjen kii mé-ni nga ta jè Cristo katasíhitjasòn-la. ⁶Titsajna-ndá-nájin nga 'ki-lajin kjohi'in nga'tsi ra mì síhitjasòn, 'kia nga ijye jcha-jin nga ijyeé nda inchinitjasòn ra jìòn.

⁷Koaá 'sín chítsijen koni 'sín tjin kjoa ra tíma. Tsa tjin jngo xita ra kò'sín tsò-la ijo-la nga jè Cristo isikasén, 'koaá 'sín nda katasíkítsjen nga ti'koaá jin, jé kjon Cristo kisikasén-te-nájin koni ra jè. ⁸Ni'sín sa'koa 'an 'nó nda síkijnaa ijo-na a'ta 'tse xá ra jin tsi'ki-najin, mì kì masabà-na; nga kíí xá isingatsja-najin jè Na'in-ná jè xá rakii mé-ni nga jìòn, isa nda kitsajna-najìòn, mì tsa ki-ni nga jin síkítsón-ya-lajin, ⁹mé-ni nga mì kò'sín kiya-najìòn nga ta jè ra mejèn-na nga minchaxkón-najìòn 'kia nga kò'sín síkásén-no xajon. ¹⁰Nga tjin i'ka xita ra tsò: “Jña xajon-la ra síkasén, sí 'nó tíchja, kò sí 'nó tjin 'én ra síkasén. Tanga 'kia nga ijye tina saba kjòn-ni ra jè, mì tsa sí xkón 'ki-ni, kò jña 'én ra chja, nda mí yá ra nda sísin-la.” ¹¹Jè xita ra kò'sín tsò, kò'sín nda katasijin-la, koni 'sín tsò jña 'én ra bi'ta-jin ya xajon ra nikasén-jin 'kia nga kjin titsajna-jin, 'koaá ti'sín 'sian-jin 'kia nga ijye titsajna masen kjòn-jin ya ajin-la xita.

¹²Kixíí kjoa, mì kì tsò takòn-jin nga ya nijngoko-jin ijo-najin kò mì tsa ya níngàsòn-kò-jin jña xita ra tijña 'nga síkítsajna-ni ijo-la. Jña xita kii, 'kia nga tijña síngàsòn-kjo-ni ijo-la kò tijña kotsíjen-jnó-ni xákjén, mì kì machiya-la mé kjoa ra 'sín. ¹³Mì tsa jè nda síkítsajna-najin ijo-najin ya nándá mì tsa ya bako-najin. Kò mì kì tsa kotonè-lajin chiba-la koni 'ki nga ijye tjinda-la Nainá nga ma sixá-jin. Nga jé kitsjá'nde-najin nga ma ijchò-jin skanda ya nándá nga titsajna jìòn ra xita Corinto 'mì-no. ¹⁴Kixíí kjoa, tsa mì-lajin ijchò ítjòn-jin, inchinikatonè-lajin chiba-la koni 'sín 'ki ki'tsi'nde-najin. Tanga jin ijchòkò ítjòn-lajin jè 'én xitse ra nda tsò a'ta 'tse Cristo. ¹⁵Mì tsa jña nda inchiníkítsajna-najin ijo-najin jña xá ra ki'sín xita ra kjíí; tsa kò'sín 'sian-jin, 'kiaá-la nga kotonè-lajin chiba-la. Jé ra mejèn-najin, koni 'sín nga isa 'nó kòkjin-isa-najìòn, 'koaá 'sín isa kotse-isa jè xá ra 'sian-jin ya ajin tsajìòn, tanga ta 'koaá 'sín tjen sixá-jin koni 'ki ijye tjen chiba-la.

¹⁶Koaá 'sín 'kénajmíya-isa-jin jè 'én xitse ra nda tsò a'ta 'tse Cristo ya 'nde ra fi-isa nga bateé naxindá-no ya ñánda nga kjè tsa yá ra bijchó 'kénajmíya, mé-ni nga mì jñà xá ra ijye ki'sin xita ra kj'íí, nda síkítsajna-najin ijo-najin.

¹⁷Jè ra jeya síikíjna ijo-la, ta isaá jnchro jè Nainá jeya katasíkíjna. ¹⁸Nga mì tsa jè ra nda kitjongi jè ra tijè nda síkíjna-ni ijo-la, jé-ní ra jè Nainá ko'sín kítsò nga bakén-la nga nda kíjna.

Kó'sín basikotjì ijo-la Pablo

11 ¹¡Mején-na tsa katachíkjoa jngohíjta-najìon nga kiná'ya-ná, nga 'koaá 'sín kichjàa koni tsa mì nda tjin kjobítsjen-na! ¡'Tiaàn kjonda katachíkjoa jngohíjta-no! ²Nga 'koaá 'sín makájno-na ra a'ta tsajìon-jìon koni 'sín makájno-la jè Nainá mé-ni nga mì kj'íí kohíko-no. Nga jngoó 'xin ijye isíkíjna'ño-no ra jè Cristo ko 'koaá 'sín mejèn-na singátsja-no a'ta 'tse Cristo koni tsa jngo chjoón xangó ra tsje tíjna. ³Tanga jé ra títsakjoon, koni 'sín ki'sin jè ye nga koó kjoa maña-la nga iskondacha-la jè chjoón ra tsikín Eva, tsa ko'sín kokama'tin-te jìon, tsa ko'sín ki'nde-te jìon nga síikítsón kjobítsjen-no nga ngakjá kongió koni 'sín nga ijye kixi kjit'atákon jìon jè Cristo. ⁴Nga bi'nde-no 'kia nga bijchójkon-no jñà xita ra isa kj'íí 'sín 'bénajmíya-no ra a'ta 'tse Jesús koni 'sín ijye tsi'kénajmíya-lajin. Ko makjiín-te-najìon 'kia nga isa kj'íí 'sín tsò kjobítsjen ra 'bénajmíya-no a'ta 'tse Inìma Tsje-la Nainá ra ijye ichjìbé jìon ya ajin inìma-no. Tì'koaá makjiín-te-najìon 'kia nga isa kj'íí tsò 'én xitse ra nda tsò a'ta 'tse Cristo ra 'bénajmíya-no koni 'sín tsò jè ra kjokjiín ítjòn-no. Ta isaá sasén-no nga na'yá-la jñà xita kii. ⁵'Koaá 'sín síkítsjen ra 'an, nga mì tsa mé ra isa nangi tíjna-la jñà xita ra ko'sín 'yaxkon jìon nga jñà títsajna ítjòn-la xita ra tsikíxáya-la Cristo. ⁶Ni'sín mì tsa tsijen ískotá'yáa koni 'sín nga chjàa, tanga mì tsa mé kjobítsjen ra chija'ta-na ra a'ta 'tse 'én-la Nainá. Ko 'koaá 'sín ijye nda tsakon kjòn-lajin a'ta 'tse nga'tsi kjoa ra ijye ki'nià-jin. ⁷¿A choó tjin koni 'sín kí'siaan 'kia nga ta ít'akon-yá kjotjò-najìon jè 'én xitse-la Nainá ra nda tsò, nga mì tsa mé ra ísijé-no? Nda kisihìmaá-na ijo-na mé-ni nga jìon nda tsikítsajna-najìon. ⁸Skanda jñà xita naxindá-la Cristo ra xin 'nde títsajna ít'sachrjéjno-la nga kítsja'ndé-la nga

tsikíchjí-na, mé-ni nga kjomà ísíxákoo-no ra jiòn. ⁹'Kia nga mé ra kjochjeén-na 'kia nga ya tsakátijnako-no, niyá ra ísijí-lá. Ta mé tsajmì ra kjochjeén-na, jñá 'ndsé ra 'ji-ni ya nangi Macedonia kitsjà-na. 'Koaá 'sín kí'siaa nga majín-naa nga jiòn i'in-ya kjomà-no, kò takó 'koaá 'sín 'sin-isa. ¹⁰Ngì koó 'én kixi-lá Cristo ra ijye kò'sín tíjnajin-na nga kò'sín chjàa, nga mì kì yá ra ma kotechjà-na ya nga tíjngo nangi Acaya nga nda ma síkíjna ijo-na a'ta 'tse kjoa ra kí'siaa, nga ta kjotjò ítsakon-yá-no. ¹¹¿Mé-ni kò'sín xian-na? ¿A kíí-ní nga mì kì tsjake-najiòn? Jè Nainá ndaá be nga 'ñó tsjake-najiòn.

¹²Koni 'sín tí'siaa, takó 'koaá 'sín 'siin-isa, mé-ni nga mì kì tjó'nde-lá jñà xitá ra mejèn-lá nga ta ijo-lá jeya siikítsajna a'ta 'tse kjoa ra 'sín, nga mejèn-lá kò'sín kítsajna koni ra jin. ¹³Nga jñà xitá kii, mì tsa yá ra tsijen tsikíxáya-lá. Ta kíí xá 'sín nga xitá bíndocha-lá, nga kò'sín síngoya ijo-lá koni tsa ngì jè saba Jesucristo tsikíxáya-lá. ¹⁴Kò mí-la tsa koxxón-ná kjoa kii, nga skanda jè xitá-níí maá-lá kò'sín siingoya ijo-lá nga kò'sín kotsíjen koni jngo ikjalí ra 'ñó fate ni'í-lá, koni tsa ikjalí 'tse Nainá. ¹⁵'Koaá ma-ni nga jñà xitá ra ya síxá'ta-lá jè xitá-níí, mì tsa jngo kjoa ra koxxón-ná tsa kò'sín síngoya ijo-lá nga kò'sín koma koni tsa xitá ra 'bénajmíya kjoa kixi-lá Nainá. Tanga jñà xitá kii, 'koaá 'sín tjábé-lá chíj-lá askan-nioo, koni 'sín tjín kjoa'cho ra inchi'sín.

Mé kjoa ra jeya síkíjna-ni ijo-lá Pablo

¹⁶'Koaá 'sín tíxin india-no, kì tì tsja yá ra kò'sín tsò-ni nga mì nda tíjna kjobítsjen-na; ni'sín tsa kò'sín níkítsjen jiòn, tì'nde-ná nga kò'sín kokó-no koni tsa mì nda tíjna kjobítsjen-na, mé-ni nga tì'koaá 'an, koma-te nda síkíjna-na ijo-na. ¹⁷Jñà 'én ra tíchjàa nga 'an nda síkíjnaa ijo-na, 'koaá 'sín tíchjàa koni tsa mì nda tíjna kjobítsjen-na nga jngoó 'én ra mì kì sasén-lá Na'ín-ná. ¹⁸Koni 'sín kjin ma-ni xitá ra 'ñó nda síkítsajna ijo-lá a'ta 'tse kjoa ra 'sín ya isà'nde, 'koaá tì'sín mejèn-na ra 'an nga nda síkíjnaa ijo-na. ¹⁹'Koaá bixó jiòn nga 'ñó tjín-no kjobítsjen, tanga bi'nde-nájiòn nga kótsò-no xitá ra mì kì nda tjíhijyo kjobítsjen-lá. ²⁰Nga skanda bi'ndeé-la jñà xitá nga chí'nda'ñó-lá 'sín-no, kò nga bachrrejno-no tsajmì ra tjín-no, kò nga beton-no, kò jñà ra tì'koaá bachrjengi-no, kò skanda síjtsin'á ya isén-no. ²¹¿Kó bixó jiòn? ¿A masabá-na nga mì

ko'sín inakjoá-lajin? Nga 'koaá bixó jiòn nga batoó indakjoa ki'nià-jin.

Tanga tsa jñà xit̃a ra i'ka 'ñó 'nga ma ikon nga 'ñó chja, ra 'an, 'koaá t̃i'sín 'ñó kichjà-te nga 'ñó 'ke-te-là takoàn, ñi'sín 'koa 'sín tíchjàa koni tsa mì nda t̃jna kjobítsjen-na. ²² Jñà xit̃a k̃i, ¿a 'ngaá ma-là nga 'én hebreo chja? Ra 'an t̃i'koaá chjà-te 'én hebreo. ¿A 'ngaá ma-là nga xit̃a Israel ra jñà? T̃i'koaá Israel-te tsa'an. Ko, ¿a 'ngaá ma-là nga jé Abraham ra kjomà xit̃a jchínga-la? T̃i'koaá 'an, jé-te kjomà xit̃a jchínga-na. ²³ ¿A chi'nda-là Cristo-ní jñà xit̃a k̃i? Ra 'an, isaá 'ñó nda t̃sísá-là jè Cristo. ('Kia nga ko'sín tíchjà, 'koaá 'sín jngoya-là koni tsa mì k̃i nda t̃jna kjobítsjen-na). Isaá 'ñó tse xá t̃jín-na ra 'an, isaá 'ñó kjo k̃jín 'ka kaya ndayá, ko isaá ta 'ñó kjo k̃jín 'ka nda síki'on-na jñà xit̃a, ko taxk̃i kjo k̃jín 'ka batojiaan ñánda nga kjame sí'ken-na jñà xit̃a. ²⁴ Ra a'ta 'tse xit̃a judío, kjo 'òn 'ka ko'sín bajá-na nga tsjá-na kjohi'in ra kàchrjó'òn ijòn 'ka tsajá-na na'ñó xoxín nga jngó jngó 'ka. ²⁵ Jàn 'ka t̃jín-ni nga ki'tsi-na kjohi'in nga ki'se-na xka ijnchra, ko jngo 'ká kjameé isì'ken-na xit̃a nga tsikínè-na najo. Jàn 'ka iskajin-ndá jè chitso ñánda ya chiba-là t̃jnaya; ko jngo nichjin ko jngo nit̃jen ya



tsakátijnajiaan ya nga masen-la ndáchikon. ²⁶Ta ñándá nga bajme, ta kjoskon tjín ki'ta-la; tjín kjoskon ya xangá ñándá bato, ko tjín kjoskon a'ta 'tse xita chijé. Tjín kjoskon a'ta 'tse ra xita judío ko a'ta 'tse ra mi tsa xita judío. Ískajiín-te kjoskon ya ajin-la naxindá, ko ya i'nde ñándá nga tsin xita. Tjín kjoskon ya ajin-la ndáchikon, ko ya ajin-la jña xita ra ko'sín tsò nga 'ndsé ma. ²⁷Kjín xá tibatojiään ra 'ño síki'on-na. Kjo kjín 'ka mi kì fájnafèe nga 'kia nga nitjen. Tíbatojin-náa kjohi'in ra 'tse kjinchrá a'ta 'tse tsajmì ra chineé ko nandá ra 'yé, sa'koaá skanda mí kì bákjen. Tísikjín-la 'nchán nga skanda tsín-na nikje ra fánaya.

²⁸Kjín kjoa tjín-ni ra tibatojin-isa; mi tsa tà jña-ni kjoa kii. Ko tímahií-te-na nga nichjin nchijòn tísikájno a'ta 'tse nga'tsi naxindá-la Cristo ra tjín. ²⁹Tsa 'kia yá ra mahinda ikon a'ta 'tse kjoa ra makjiín-la, za mí tsa ti'koa ka'ta-te-la inima-na 'kia nga ko'sín ma? Ko 'kia nga yá ra kaníjin-no jé, za mí tsa 'ño majti-na ra 'an? ³⁰Tsa machjeén nga nda sikíjnaa ijo-na, maá-la nda sikíjna-na ijo-na a'ta 'tse kjoa ra mahinda-ni jè takoään. ³¹Nainá ra Na'in-la ma Jesucristo ra tíjna ítjòn-ná, jé ra bakèn-la nga nda kata'yaxkón skanda ta mé nichjin-ni, jé nda tíbe nga mi tsa 'én ndiso-jìn ra tíchjàa. ³²Ya Damasco jè xita ra ya tibatéxoma ra jè kitsjà-la xá jè xitaxá ítjòn ra 'mi Aretas, isikasén xita-la nga isikìnda ya xotjoba-la naxindá, nga mejèn-la nga jtsaba'ño-na. ³³Tanga jña xita, na'ño tsikí'ta jngo ndisiyá ra isíkijnaya-na, mé-ni nga tsajen-ngi-na ya ñándá tí'xákji jè chrjó ra tíchjàndi-la naxindá. 'Koaá 'sín kjomà-ni nga ma jáhachinga.

Kjoa ra kjòchiya tsijen-la Pablo

12 ¹Kixií kjoa nimé chjí-la tsa nda síkíjna ijo-na, tanga machjeén-ní nga 'kenájmí-najìòn kjoa ra tísichiya-na Nainá ko kó'sín tjín kjoa ra jè tsakón tsijen-na. ²Bexkoón jngo ra xita-la Cristo. Fí-la tsa te ijòn nó nga itjamítjen nga kiji skanda ñándá nga tíjna ra ma-ni ján ngajmi. Mi kì be, a 'koaá 'sín kiji ko ijo-la o ra ta jé inima-la kiji; tanga jè Nainá ra nda be. ³⁻⁴Tanga beé-ná nga jè xita rakìi, yaá kiji ngajmi, ya i'nde ñándá nga 'ño nda chon. Mi kì be, a 'koaá 'sín kiji ko ijo-la o ra ta jé inima-la ra kiji; tanga jè Nainá ra nda be. Ko yaá kí'nchré 'én ra 'ño 'ma tjín, ra mi kì tí'nde-la nga nijngo xita koma

kichja. ⁵Maá-la nda síkíjnaa koni 'sín kjomà'tin xit̃a rak̃i. Tanga mì ki ma t̃i'an nda síkíjna-na ijo-na. Ta jè nda síkíjna-na ijo-na a'ta 'tse kjoa ra mahinda-ni takoàan. ⁶Tanga tsa nda síkíjna ijo-na koni 'sín kjomà'tiaan, mí-la tsa tsò-ni kjoa nga ská-na, 'én kixíi-la ra kichjàa; tanga majìn-na nga ko'sín 'siaan, mé-ni nga mì yá ra ko'sín ta jè kjoa ra tsa'an isa nda síkítsjen-ni, koni 'sín nga 'ki kjòn-na kò koni 'sín tsò 'én ra chjàa.

⁷Mé-ni nga mì 'an nda kótijna-na nga'tsi kjoajeya ra tsakón tsijen-na Nainá, 'koaá ma-ni nga jngo kjohi'in tsi'kì-na ra 'koaá jngoya-la koni tsa na'yá inchajin ijo-na, ra jè xit̃a-níi isikasén mé-ni nga sketon-na. ⁸Kjo jàn 'ka bitsá'ba-la jè Na'in-ná nga katjahíxìn-na jè kjohi'in rak̃i; ⁹tanga ta kíi 'sín kitsò-na: “Jè kjonda-na ra ijye kítsja-la, jè kosiko'ta-li, nga mì mé jchija'ta-li nga'nó-na 'kia nga mahinda takìn.” 'Koaá ma-ni, jè kjoa ra mahinda-la takoàan, jé ra nda síkíjna-na ijo-na, mé-ni nga jè nga'nó-la Cristo yaá kíjnako ki'ta-na. ¹⁰'Koaá ma-ni, 'nó matsja-na 'kia nga mahinda takoàan, kò 'kia nga yá ra chjajno-na, 'kia nga mé ra tíchija'ta-na, kò 'kia nga yá ra mahatjingi-na, 'kia mé kjoa ra chjá ma-na, matsjaá-na nga a'ta 'tse Cristo sikjiáan kjohi'in. Nga ki, 'kia nga mahinda takoàan, 'kiaá jnchro nga isa 'nó tjin-la nga'nó iníma-na.

¹¹'Koaá 'sín tí'siaan koni tsa ská-na, tanga jión kjo'nó ki'niá-nájiòn nga ko'sín kí'siaan. Jión kjón-najiòn ra tjinè-la nga nda kináchrjengi-nájiòn tsa nda kjòn-ni, nga mì tsa isa nangi tijná-la 'an jñá xit̃a ra ko'sín 'yaxkón jiòn nga jñá títsajna ítjòn-la xit̃a ra tsikíxáya-la Cristo; kja ni'sín nímé chjí-na ra 'an. ¹²'Kia nga ya tsakátijnajin-no, kichíkjokó-na nga kítsakon-no kjojkón ra bakón nga ngi 'an kiti-ná ra tsikíxáya-na Cristo; nga kítsakon-no kjojkón ra bíya chiya, kjojkón ra bakón kjoajeya-la Nainá kò ra tse nga'nó tjiko. ¹³¿Mé ra isa nangi isíkijna-najiòn koni jñá naxindá-la Cristo ra i'ka? ¿Q ra 'choó ma-no nga nímé ra isijé-no? Tijchaà'tá-ná tsa'koa tsa ko'sín kí'siaan.

'Koaá 'sín isíkítsjen jè Pablo nga kiji ya Corinto ra ma-ni jàn 'ka

¹⁴Ijyeé tijnanda-náa nga íjkon-no ra ma-ni jàn 'ka. Kò takó mì tsa jiòn sijtí-no mé ra chija'ta-na. Mì tsa ki batsjía mé ra tjin-najiòn; jión-nájiòn ra tibatjí-no. Nga mì tsa jñá ra íxti tjinè-la kiitjò ton ra machjeén-la na'in-la; jè na'in ra tjinè-la nga kiitjò ton ra kochjeén-la íxti-la. ¹⁵'An skanda ngi koó

kjotsja-na nga sikjéheya ton ra tsa'an, ko skanda sikjé-te nga'ño ra 'tse inima-na, ta ngatji-la nga 'ño tsjake-najiòn. Koni 'sín 'ño tsjake-najiòn, ¿a ta isaá jnchro chiba kotsjacha-najiòn?

¹⁶ Ni'sín ta kó'sín-isa, 'an mi tsa mé ra jiòn isijti-no.

Kja ni'sín tjín i'ka xita ra tsò, nga ta maña-ró ra 'an nga ískondacha-najiòn. ¹⁷ ¿Mé ra ískondacha-najiòn 'kia nga ísikásén i'ka-no xita? ¹⁸ Jè Tito ísikítsá'ba-la nga ísikásén-no ko jè 'ndsé ra ijngo. ¿A ta iskondachaá-no Tito? ¿A mí tsa ngásòn tjín kjóbítsjen-najin ko inima-najin?

¹⁹ ¿A 'koaá 'sín inchiníkítsjen ki'ta jiòn nga jé ijo-najin inchinakjoátji-jin? Tanga mi tsa ko'sín tjín-jin. Jin ra chi'nda-la Cristo, ngixkon Nainá-ní koni 'sín nga inchinakjoá-jin. Jiòn 'ndsé ra 'ño tsjake-no, nga'tsi kjoa ra inchi'nià-jin, jè ra mejèn-najin nga katatjo nga'ño-isa jiòn. ²⁰ Makájno-na tsa mi ko'sín titsajna jiòn 'kia nga kijchòjkon-no koni 'sín nga mejèn-na ra 'an. Ko tsa mi ko'sín 'siaan ra 'an 'kia nga kijchòj koni 'sín nga inchihiñá jiòn. 'Kia kijchòj, tsa inchihiñá-kjoó-najiòn, ko tsa kjoaxitakòn tjín-jin inima-no, ko tsa kjoiti tjíjin ya inima-najiòn, tsa jò jàn ya tjín jiòn, ko tsa 'én ndiso inchiniya-la xàngioo, tsa xàngioo inchihibaya-no, tsa kjoa 'nga takòn tjín-no, ko tsa mi nda titsajna-la xàngioo nga jngó jngó-no. ²¹ Ti'koaá makájno-na tsa 'kia nga kijchòjkon india-najiòn, tsa jè Nainá 'ño nangi siikijna-na ya ngixkon jiòn. Ko tsa ya skindayatjia jña xita ra takó ko'sín inchihiñá-jé ki'ta koni kjotseé nga kjè kì síkájno-ni nga'tsi kjoatjé ra inchi'sín, ko kjoachijngi-la, ko kjoa chinga ra inchi'sín ko nga'tsi kjoa'cho ra mi kì nda tjín.

'Én-la Pablo ra fehe'ta-ni

13 ¹ Yaá ma-ni jàn 'ka nga kijchòjkon-no 'ndi 'ndi. Katafiya-no koni 'sín tsò xajon-la Nainá: 'kia nga sindajín jngo kjoa, tjínè-la tsa jò ko tsa jàn xita tsjá 'én-la ra xkon kijtse-ni kjoa ra kjomà. ² 'Koaá 'sín ijye kíxian kixi-no 'kia nga ijchòjkon-no ra ma-ni jò 'ka, ko 'koaá 'sín tíxian india-no 'ndi-ni, ni'sín ta kjin tjina-na; jña ra ko'sín tsakátsji-jé ko ra inchihiñá-jé-isa 'ndi-ni: Tsa 'kia nga kijchòjkon india-no mi tsa taxki sijchá'ta-la kjoa ra tjín-la nga jngó jngó xita. ³ Nga 'koaá 'sín mejèn-najiòn nga jchaa a kixí kjoa nga jè Cristo chjà ngajo-la. Tanga jè Cristo mi tsa ta indakjoa 'sijn

ra a'ta tsajìon-jìon, ta isaá ya kíjnajin-no jè nga'nó-la. ⁴Kixíí kjoa jè Cristo 'kia nga isi'ta krò, 'koaá 'sín 'ki kjomà koni tsa tsin-la nga'nó; tanga ngi koó nga'nó-la Nainá tijnakon-ni 'ndi 'ndi. 'Koaá tì'sín kjòn-te-jin koni Cristo, koni tsa tsin-te-najin nga'nó; tanga koó nga'nó-la Nainá koma ya taña kitsajnakò-jin Cristo mé-ni nga ma sixá-najin ra a'ta tsajìon.

⁵Nda tichiyajin-la inìma-no, ¿a takó ndaá makjiín-no ra a'ta 'tse Cristo? Tijiòn nda chjí'ta-no ijo-no, kó'sín titsajna. ¿A kjeé nda machiya-no nga jè Jesucristo yaá tijnajin ya inìma-no? Kja tajngoó-la tsa mì kì tsatojion koni 'sín nga itjá'ta. ⁶'Koaá 'sín koñáa ra 'an, nga 'koaá 'sín nda katasijngo takòn ra jìon, ra ngajin, skanda 'ndi tsatojin-najin koni tjin 'ka ijye itjá'ta-jin. ⁷'Koaá 'sín inchinakjoá'ta-lajin Nainá mé-ni nga nijngo kjoa ra 'cho tjin 'sian jìon; mì tsa tsò-ni kjoa nga jiín ko'sín kata'ya-najin nga ndaá inchibatojin-jin kjoa; jé-ni mé-ni nga ko'sín 'tiaàn jìon kjoa ra nda tjin, ni'sín ko'sín katatsíjen-jin ra jin koni tsa mì kì chikjoa-najin kjoa ra batojin-jin. ⁸Nga mì kì ma jin kó 'kín-lajin xita ra síhitjasòn kjoakixi, ta jé-la jnchro 'ki nga'nó isa-lajin. ⁹'Koaá ma-ni ta isaá matsja-najin 'kia nga inda tjin takòn-jin, mé-ni nga isa kata'se-la nga'nó inìma-no ra jìon; ko inchinakjoá'ta-isa-lajin Nainá mé-ni nga nimé jchija'ta-no ra a'ta 'tse. ¹⁰Kíí ko'sín tjen tíbindá-no xajon rakii, 'kia nga tikjè ya tijnako-no, mé-ni nga 'kia nga kijchòo, mì tsa bato 'nó kokó-no nga sikjéen kjotéxoma ra ko'sín jè Na'ín-ná kitsjà-na; ko mì tsa ki xá ki'tsi-na kjotéxoma rakii nga ta isa jìon sikítsón-no; kíí-ní mé-ni nga isa katasakó-isa-najìon nga'nó ra 'tse Nainá.

Kó'sín nga síhixo'ta xita Corinto jè Pablo jè 'én ra fehe'ta-ni

¹¹Jìon 'ndsé ko tichjeé, ta nga'tsi kjoa kii, jè ra 'nó machjeén nga 'nó tsja kata'se-la inìma-najìon. Nga kixi titsajna jìon ya ngixkon Nainá, tjetakòn jìon xita xàngioo, jngoó kjòbitsjen kata'se-no ta nga'tsi-no, ko 'nchán titsajnakoo xàngioo. Jè Nainá ra tjin-la kjotsjacha ko ra tjin-la kjo'nchán yaá kíjnako-no. ¹²Ngì koó inìma-no tikjáya-la xàngioo nga jngó jngó-no. ¹³Nga'tsi xita-la Nainá, 'koaá 'sín inchisíhixo'ta-no.

¹⁴Nda katijnako-no nga'tsi-no jè kjonda-la Jesucristo ra tjna ítjòn-ná, ko kjotsjacha-la Nainá, ko jè Inìma Tsje-la Nainá ra síkítsajnakjo-ná. Ko'sín katama.